







Candela devastador a destrui Amuse Sunset Restaurant na Bucutiweg



ORANJESTAD (AAN): Un di e restaurantnan cu Aruba tin riba un Pier special na Bucutiweg, ta hopi popular mes riba Social Media. Especialmente turistanan cu ta miembro di TripAdvisor, sa bishita Amuse Sunset Restaurant cu frecuencia ora cu nan bin Aruba.

Desde cu Amuse Sunset Restaurant a establece su mes eynan, e tabata haya turistanan cu ta busca un mesa net na rand di e pier, pa asina goza di un fabuloso bahada di solo, cu bon servicio di waitress, y chef Patrick cu ta percura suculento platonan cu

ta haya aprecio na monton, incluyendo postrenan cu ta plama tur rond riba Instagram.

Chef Patrick Vanderdonk y su esposa Ivette Benavides, a traha hopi duro pa a haci Amuse Sunset Restaurant bira e cozy spot cu el a converti su mes aden. Cada biaha tabata sigui build-up y mehora e lugar. E area di Bar mes tabata uno cu tabata agradable pa sinta y goza di e brisa cu ta pasa door di e lugar.

Pero Diadomingo anochi algo a socede cu ta cambia bida di e doño- y empleadonan pa semper. Algo prome cu 12:00 am,

yamada a dreña indicando cu tin candela na Amuse Sunset Restaurant na Bucutiweg 50.

E candela tabata un completo 'uitslaande brand' ora cu Bomberonan a yega. Full e dak, y tambe e deck di e Pier tabata na candela, incluyendo e stoel y mesanan. Como cu mayoria di e restaurant ta construi cu palo, esaki a kima basta rapido. Hasta parti di e Pier tabata na candela.

E candela a hasta plama, y a cuminsa kima un Boto cu tabata mara na e Pier. E boto aki a kima te cu parti di dje a sink. Den oranan di madrugada porfin

Bomberonan tabatin e candela full bao control.

Pero e candela a destrui Amuse Sunset Restaurant completamente! Pa e propietario y tambe e empleadonan, esaki ta un noticia cu a laga nan henter Dialuna masha tristo mes. DIARIO a compronde cu hasta turistanan cu den e siman- y lunanan venidero tin reservacion haci eynan, a expresa nan tristeza.

E restaurant pues a stop di existi, y awor lo tin di djis laga Cuerpo di Bombero como tambe Polis di Departamento di BFTO

haci investigacion. Ora cu solo a sali, e empleado- y doñonan tabata presente djis pa mira con destrui e lugar a keda. Polis a pidi nan pa por fabor no mishi cu nada cu por stroba e investigacion, y na a bisa cu esey no ta nan intencion. Nan kier a djis bin mira con nan lugar di trabao a keda.

E propietario Patrick y Ivette a indica cu e candela aki a laga nan negoshi devasta. Y nan ta gradici pa e sosten cu nan ta ricibiendo di famia y amigonan den e momentonan dificil aki.